



食貨典第二百五十六卷

國用部紀事二

宋史徽宗章賢妃傳妃高祖母也從上皇北遷紹興七年遙尊爲皇太后高宗奉迎入居慈寧宮二十九年崩諡曰顯仁太后性節儉有司進金唾壺太后易令用塗金宮中賜予不過三數千所得供進財帛多積于庫至是喪葬之費皆仰給焉

葉顥傳顥爲尙書左僕射兼樞密使上以國用未裕詔宰相兼國用使叅政同知國用事顥乃言今日費財養兵爲甚兵多則有冗卒虛籍無事則費財有事則不可用雖曰汰之旋即招之欲足國用當嚴于汰緩于招可也孔子曰節用而愛人蓋節用則愛人之政自行于其間若欲生財祇費民財爾上曰此至言也

姦臣傳万俟卨擢右正言和議成萬請詔戶部會計用兵之時與通和之後所費各幾何若減于前日乞以羨財別具御前激賞庫不許他用蓄積稍實可備緩急

李迨傳迨以龍圖閣直學士爲四川都轉運使踰年詔迨以每歲收支之數具旁通驛奏迨乃考其

本末具奏曰紹興四年所收錢物三千三百四十二萬餘緡此所支關五十一萬餘緡五年收三千六十萬緡此所支關一千萬餘緡六年未見七年所收三千六百六十萬餘緡此所支關一百六十一萬餘緡自來遇歲計有闕卽添支錢引補助紹興四年添印五百七十六萬道五年添印二百萬道六年添印六百萬道見今泛料太多引價頓落緣此未曾添印兼歲收錢物內有上供進奉等窠名一千五百九十九萬係四川歲入舊額其勸諭激賞等項窠名錢物共二千六十八萬係軍興後來歲入所增比舊額已過倍其取于民可謂重矣臣嘗考劉晏傳是時天下歲入緡錢千二百萬而管權居其半今四川權鹽權酒歲入一千九十一萬過于晏所權多矣諸窠名錢已三倍劉晏歲入之數彼以一千二百萬贍中原之軍而有餘今以三千六百萬贍川陝一軍而不足又如折估及正色米一項通計二百六十五萬石止以紹興六年朝廷取會官兵數計六萬八千四百四十九人決無一年用二百六十五萬石米之理數內官員一萬一千七員軍兵五萬七百四十九人官員之數比軍兵之數約計六分之一軍兵請給錢比官員請給不及十分之一卽是冗濫在官員不在軍兵也計司雖知冗濫力不能裁節之雖是寬剩亦未敢除減此朝廷不可不知也蜀人所苦甚者糴

買般運也蓋糴買不科數則不能集其事苟科數則不能無擾般運事稍緩則船戶獨受其弊急則稅戶皆被其害欲省漕運莫如屯田漢中之地約收二十五萬餘石若將一半充不係水運去處歲計以米一半對減川路糴買般發歲計米亦可少寬民力兼臣已委官于興元洋州就糴夏麥五十萬石岷州欲就糴二十萬石兼用營田所收一半之數十二萬石三項共計五十七萬石每年水運應付閬利州以東計米五十八萬石若得此三項可盡數免川路糴買般運此乃恤民之實惠守邊之良策也降詔獎諭

后妃傳孝宗李賢妃初入宮爲典字轉通義郡夫人進婕妤淳熙十年卒時李燾在經筵嘗諫省後宮費帝曰朕老矣安有是近葬李妃用三萬緡耳

齊東野語紹興歲幣銀二十萬兩絹二十萬疋樞密院差使臣四員管押銀綱戶部差使臣十二員管押絹綱同左帑庫子秤子於先一年臘月下旬至盱眙軍歲幣庫下卸續差將官一員部押軍兵三百人防護過淮交割官正使例差淮南漕屬副使本軍倅或隣州倅例用歲前三日先齎銀百錠絹五百疋過淮呈樣金人交幣正使例是南京漕屬副使諸州向知於所齎銀絹內揀白絹六疋銀

六銖三分之令走馬使人以一分往燕京一分往汴京漕司呈樣一分留泗州歲幣庫以備參照例用開歲三日長交通不過兩月結局初交絹十退其九以金人秤尺無法又胥吏需索作難之故數月後所需如欲方始通融然亦十退其四五又貼耗銀二千四百餘兩每歲例增添銀二百餘兩並淮東漕司管認凡吾正副使并官吏飯食並淮東漕司應辦下至安泊棚屋廚廁等皆自盱眙運竹木往彼蓋造彼皆不與焉盱眙日差倚郭知縣部夫過淮搬運銀絹兼應辦事務其揀退者過夜復搬運過淮歸盱眙庫交收其勞人往復如此且我官吏至淮北岸約三百餘步始至交幣所皆徒步而往雨濘則攝衣躡屐蹣跚而行艱苦不可具道也淳熙十三年淮南漕司幹官權安節爲歲幣使其金人正使一毫不取揀退銀絹甚多逼令攜歸安節固拒金人至遣甲兵逼逐安節不勝其憤曰寧死於此不得交誓不回雖野宿不火食亦無害聲色俱厲彼度不能奪竟如數收受給公文而歸壽皇知之喜曰安節在彼界能如此甚可重若非遇事何自知之遂除監六部門時通判揚州汪大定亦同此役頗著勞績亦蒙獎拔焉若正旦生朝遣使每次禮物金器一千兩銀器一萬兩綵段一千匹又有腦子香茶等物及私覲香茶藥物果子幣帛雜物等復不與焉若外遣泛使則其禮物等

又皆倍之又有起發副使土物之費又有朝辭回程宣賜等費若肝貽等軍在路四處應辦南北賀正生辰常使往回程各八次賜御筵每處費錢一萬八千五百餘貫而沿途應辦復不預若北使之來賜予尤不貲焉至元朮病篤之際告戒其四行府帥云江南累歲供需歲幣竭其財賦安得不重斂於民非理擾亂人心離怨叛亡必矣在彼者尙知有此爲我者當何如哉時聘使往來旁午於道凡過肝貽例遊第一山酌玻璃泉題詩石壁以紀歲月遂成故事鐫刻題名幾滿紹興癸丑國信使鄭汝諧一詩云忍恥包羞事北庭奚奴得意管逢迎燕山有石無人勒却向都梁記姓名可謂知言矣噫開邊之用固無窮而和戎之費亦不易余因詳書之

癸辛雜識沈夏德清人壽皇朝爲版曹貳卿一日登對上問版曹財用幾何合催者幾何所用幾何虧羨幾何夏一一奏對訖於所佩夾袋中取小冊進呈無毫髮差上大喜次日問宰臣曰侍郎有過政府例否梁克家奏云陛下用人何以例爲遂特除僉書樞密院事

宋史項安世傳安世累遷校書郎寧宗卽位詔求言安世應詔言管夷吾治齊諸葛亮治蜀立國之本不過曰量地以制賦量賦以制用而已陛下試披輿地圖今郡縣之數比祖宗時孰爲多少比秦

漢隋唐時孰爲多少陛下必自知其狹且少矣試命版曹具一歲賦入之數祖宗盛時東南之賦入幾何建炎紹興以來至乾道淳熙其所增取幾何陛下試命內外羣臣有司具一歲之用人主供奉好賜之費幾何御前工役器械之費幾何嬪嬙宦寺廩給之費幾何戶部四總領養兵之費幾何州縣公使迎送請給之費幾何陛下必自知其爲侈且濫矣用不量賦而至於侈且濫內外上下之積不得而不空天地山川之藏不得不竭非忍痛耐謗一舉而更張之未知其所以終也今天下之費最重而當省者兵也能用土兵則兵可省能用屯田則兵可省其次莫如宮掖兵以待敵國常畏而不敢省故省兵難宮掖以私一身常愛而不忍省故省宮掖難不敢省者事在他人不忍省者事在陛下宮中之嬪嬙宦寺陛下事也宮中之器械工役陛下事也陛下肯省則省之宮中旣省則外廷之官吏四方之州縣從風而省奔走不暇簡樸成風民志堅定民生日厚雖有水旱蟲蝗之災可活也國力日壯雖有夷狄盜賊之變可爲也復祖宗之業雪人神之憤惟吾所爲無不可者

黃疇若傳疇若遷殿中侍御史兼侍講朝廷與金人約和金人約函致侂冑首詔令臺諫侍從兩省雜議疇若與章燮等奏乞梟首然後函送敵國人譏其有失國體疇若奏今帑藏無餘歲幣若必睥

視於百姓願自宮禁以及宰執百官共爲撙節逐年椿積遂置安邊所戶部侍郎沈誥條具合節省拘催者疇若復乞依仁宗孝宗兩朝成訓凡節省事在內諸司選內侍長一員令自行搜訪條具來上在外廷三省則委宰掾樞屬六曹則委長貳事干浮費者聞奏又乞以官司房廊及激賞庫四季所獻并佞冑萬畝莊等一并拘椿旣而內廷及酒所減省議多格獨得估籍奸臧及房廊非泛供須五項總緡錢九百一十三萬有奇外椿留產業每歲又可得七十一萬五千三百餘緡疇若乞令後省類聚

李宗勉傳宗勉遷著作郎兼權兵部郎官疏言欲財計之豐莫若節國用善爲國者常使財勝事不使事勝財今山東之旅坐糜我金穀河南江右閩中之寇蹂踐我州縣苟浮費泛用又從而侵耗之則漏卮難盈蠹木易壞設有緩急必窘於調度而事機失矣

癸辛雜識和劑惠民藥局當時製藥有官監造有官監門又有官藥成分之內外凡七十局出售則又各有監官皆以選人經任者爲之謂之京局官皆爲異時朝廷之儲悉屬之太府寺其藥價比之時直損三之一每歲糜戶部緡錢數十萬朝廷舉以償之

金史張汝弼傳世宗卽位汝弼與叔元素俱往歸之擢應奉翰林文字自皇統以來內藏諸物費用無度吏貨緣爲奸多亡失汝弼與宮籍直長高公穆入殿小底王添兒閱實之以類爲籍作四庫以貯之於是內藏庫使王可道等皆杖一百汝弼等各進階

梁肅傳肅改大興少尹上疏言方今用度不足非但邊兵耗費而已吏部以常調除漕司僚佐皆年老資高者爲之類不稱職臣謂凡軍功進士諸科門蔭人知錢穀利害能使國用饒足而不傷民者許上書自言就擇其可用授以職事每五年委吏部通校有無水旱屯兵視其增耗而黜陟之不報後召拜叅知政事上奏曰方今斗米三百人已困餓以錢難得故也計天下歲入二千萬貫以上一歲之用餘千萬院務坊場及百姓合納錢者通減數百萬院務坊場可折納穀帛折支官兵俸給使錢布散民間稍稍易得上曰懸欠院務許折納可也

移刺道傳道遷戶部尙書上曰朕初卽位卿爲戶部員外郎聞卿孳孳爲善進卿郎中果有可稱及貳京尹亦能善治戶部經治國用卿其勉之道頓首謝

李石傳石封道國公上幸西京石與少詹事烏古論三合守衛中都宮闕詔曰京師巡禦不可不嚴

近都猛安內選士二千人巡警仍給口餼粟謂宰臣曰府庫錢幣非徒聚貨也若軍士貧弱百姓困乏所費雖多豈可已哉

劉炳傳炳中進士第卽日上書條便宜十事其七曰崇節儉以省財用今海內虛耗田疇荒蕪廢奢從儉以紓生民之急無先於此者八曰去冗食以助軍費兵革之後人物彫喪者十四五郡縣官吏署置如故甚非審權救弊之道

陳規傳規爲監察御史貞祐四年條陳八事三曰崇節儉以答天意昔衛文公乘狄人滅國之餘徙居楚丘纔革車三十輛乃躬行儉約冠大帛之冠衣大布之衣季年致騾牡三千遂爲富庶漢文帝乘秦項戰爭之後四海困窮天子不能具鈞駟乃示以敦朴身衣弋絺足履革舄未幾天下富安四夷咸服國家自兵興以來州縣殘毀存者復爲土寇所擾獨河南稍安然大駕所在其費不貲舉天下所奉責之一路顧不難哉賴陛下慈仁上天眷佑蝗災之餘而去歲秋禾今年夏麥稍得支持夫應天者要在以實行儉者天必降福切見宮中及東宮奉養與平時無異隨朝官吏諸局承應人亦未嘗有所裁省至于貴臣豪族掌兵官莫不以奢侈相尙服食車馬惟事紛華今京師鬻明金衣服

及珠玉犀象者日增于舊非克己消厄之道願陛下以衛文公漢文帝爲法凡所奉之物痛自撙節
罷冗員減浮費戒豪侈禁戢明金服飾庶皇天悔禍太平可致

張行信傳行信爲彰化軍節度使兼涇州管內觀察使行信始至涇卽上書曰近聞保舉縣令特增
其俸此朝廷爲民之善意也然自關以西尙未有到任者遠方之民不能無望豈舉者猶寡而有所
不敷耶乞詔內外職事官益廣選舉以補其闕使天下均受其賜且丞簿尉亦皆親民而獨不增俸
彼旣不足以自給安能禁其侵牟乎或謂國用方闕不宜虛費是大不然夫重吏祿者固使之不擾
民也民安則國定豈爲虛費誠能裁減冗食不養無用之人亦何患乎不足今一軍充役舉家廩給
軍旣物故給其子弟感悅士心爲國盡力耳至於無男丁而其妻女猶給之此何謂耶自大駕南巡
存贍者已數年張頤待哺以困農民國家糧儲常患不及顧乃久養此老幼數千萬口冗食虛費正
在是耳如卽罷之恐其失所宜限以歲月使自爲計至期而罷復將何辭上多採納焉

元史憲宗紀三年帝幸火兒忽納要不花之地諸王拔都遣脫必察詣行在乞買珠銀萬錠以千錠
授之仍詔諭之曰太祖太宗之財若此費用何以給諸王之賜王宜詳審之此銀就充今後歲賜之

數

董俊傳俊子文用轉禮部尙書遷翰林集賢二院學士知祕書監時中書右丞盧世榮以貨利得幸權要爲貴官陰結貪刻之黨以錙銖倍克爲功乃建議曰我立法治財視常歲當倍增而民不擾也詔下會議人無敢言者文用陽問曰此錢取於右丞之家耶將取之於民耶取於右丞之家則不敢知若取諸民則有說矣牧羊者歲嘗兩剪其毛今牧人日剪其毛而獻之則主者固悅其得毛之多矣然而羊無以避寒熱卽死且盡毛又可得哉民財亦有限取之以時猶懼其傷殘也今盡刻剝無遺猶有百姓乎世榮不能對丞相安童謂坐中曰董尙書真不虛食俸祿者議者出皆謝文用曰君以一言折聚斂之臣而厚邦本真仁人之言哉世榮竟以是得罪

不忽木傳不忽木至元二十一年召叅議中書省事時權茶轉運使盧世榮阿附宣政使桑哥言能用己則國賦可十倍於舊帝以問不忽木對曰自昔聚斂之臣如桑弘羊宇文融之徒操利術以惑時君始者莫不謂之忠及其罪稔惡著國與民俱困雖悔何及臣願陛下無納其說帝不聽以世榮爲右丞不忽木遂辭叅議不拜二十二年世榮以罪被誅帝曰朕殊愧卿擢吏部尙書

朶羅台傳朶羅台拜監察御史遷四川行省在四川時嘗上疏曰內外修寺雖支官錢而一椽一瓦皆勞民力百姓嗟怨感傷和氣宜且停罷仍減省供佛飯僧之費以紓國用如此則上應天心下合民志不求福而福自至矣

拜住傳拜住爲右丞相帝在上都夜寐不寧命作佛事拜住以國用不足諫止之

續文獻通考至治三年帝御大安閣見太祖世祖遺衣皆以織素木絲爲之重加補綴嗟嘆良久謂侍臣曰祖宗創業艱難服用節儉乃如此朕焉敢頃刻忘之

春明夢餘錄明初邊制止遼東大同宣府延綏四鎮繼以寧夏甘肅薊州爲七又繼固原山西爲九其防守土馬各鎮原自有主兵一鎮之兵足以守一鎮之地其合用芻糧各鎮原自有屯田一軍之田足以贍一軍之用後主兵不足增以募兵募兵不已增以客兵調集多於往時而坐食愈衆屯糧不足加以進運饋餉溢於常額而橫費者滋甚大農潘潢言邊餉取辦民屯馬料取之採牧昔者未嘗稱乏今動稱不足屢請內帑虛腹心以奉四肢非完策也宜嚴覈民運完欠屯種虛實是後會計歲用先儘民屯二糧開中鹽引及各稅課等項通融計算裒多益寡或有非常蠲減方許奏發帑銀

庶邊臣奏討之煩非所慮矣

續文獻通考景皇帝嘗爲銀豆等宮中賜內侍爲鬪笑又爲金錢御經筵命中官擲於地令講官就拾之稱爲恩典時楊文懿守陳在翰林賦銀豆有官倉有米無銀糴操瓢盡作溝中瘠願將銀豆三千斛活取枯骸百萬人之句國家內帑積金十窖每窖凡若干兩蓋累朝儲之以備邊虞未嘗輕費景泰末頗賞賜浪費英宗居南城聞之嘆曰累世之積其盡乎甫復位亟往觀之則金具存止缺一角旋節他費補之及成化中太監梁芳韋興等作奇技淫巧禱祀宮觀寶石之事興於是十窖俱罄懸上一日指示芳等曰帑藏之空皆爾二人爲之興惶懼不敢對芳仰言曰臣爲陛下造齊天之福何謂虛費因數三官廟五顯廟之類曰此皆資後福上不悅起曰吾不與汝計後之人必有與汝計者蓋指東宮言也

明外史毛弘傳丘弘再遷至都給事中言在京百獸房及清河寺諸處所育珍禽野獸日飼魚肉米菽乞並縱放以省冗費報聞

明通紀成化十二年改巡撫甘肅右副都御史朱英總督兩廣軍務兼理巡撫英湖廣桂陽人先是

韓雍經略斷簾峽等地方用度浩繁府庫耗竭英繼其後撙節數年府庫頗充有言以羨餘進者英曰王者藏富於郡縣兩廣用兵不常苟進以希寵則他日餽餉奚從取給乎

明外史秦紘傳紘進福建左布政使總制兩廣軍務奏言總鎮府故有賞功所歲儲金錢數萬費出無經宜從都御史勾稽

耿裕傳裕拜禮部尙書時公私侈靡耗費日廣裕隨事救正或因災異條上時事或申理言官先後陳言甚衆大要歸於節儉給事中鄭宗仁疏節光祿供應裕等請納其奏巡視光祿御史田澹以供費不足累行戶請借太倉銀償之裕等言疑有侵盜弊請勅所司禁防帝皆從之

周經傳經爲吏部左侍郎嘗上言外戚家無功求遷無勞乞賞兼齋醮游宴濫費無紀致帑藏殫虛宜大爲撙節給事中魯昂請盡括稅役金錢輸太倉經曰不節織造賞賚齋醮土木之費乃欲括天下財給事言非是內官傳旨索三萬兩爲燈費持不與

劉健傳健進禮部右侍郎入內閣叅預機務弘治十四年秋帝以軍興缺餉屢下廷議健等言天下之財其生有限今光祿歲供增數十倍諸方織作務爲新巧齋醮日費鉅萬太倉所儲不足餉戰士

而內府取入動四五十萬宗藩貴戚之求土田奪鹽利者亦數千萬計土木日興科斂不已傳奉冗官之俸薪內府工匠之餽廩歲增月積無有窮期財安得不匱今陝西遼東邊患方殷湖廣貴州軍旅繼動不知何以應之望陛下絕無益之費躬行節儉爲中外倡而令羣臣得畢獻其誠請求革幣之策天下幸甚

侶鍾傳鍾弘治十三年進戶部尙書十五年上天下會計之數言常入之賦以蠲免漸減常出之費以請乞漸增入不足當出正統前軍國費省小民輸正賦而已自景泰至今用度日廣額外科率河南山東邊餉浙江雲南廣東雜辦皆昔所無民已重困無可復增往時四方豐登邊境無調發州縣無流移今太倉無儲內帑殫絀而冗食冗費日加於前願陛下惕然省憂厚加損節且勅廷臣共求所以足用之術帝乃下廷臣議議上十二事其罷傳奉冗官汰內府濫收軍匠清騰驪四衛勇士停寺觀齋醮省內侍畫工番僧供應禁王府及織造濫乞鹽引令有司徵莊田租皆權倖所不便者疏留數月不下鍾乃復言之他皆報可而事關權倖者終格不行

韓文傳文召拜戶部尙書文凝厚雍粹居常抑抑至臨大事剛斷無所撓武宗卽位賞賚及山陵大

婚諸費需銀百八十萬兩有奇部帑不給文請先發承運庫詔不許文言帑藏虛實自京邊軍士外請分別給銀鈔稍益以內府錢并暫借勦賊賜莊田稅而敕承運庫內官核所積金銀著之籍且盡罷諸不急費帝不欲發內帑命文以漸經畫

孫交傳交拜戶部尚書致仕世宗卽位召復故官武宗侈汰之後庫藏殫虛交裁冗食定經制宿弊爲清然事涉中官者帝亦不能盡從也嘗會廷臣議發內帑給軍廩官俸已報可爲中官梁諫等所沮交言宮府異同令出復反非新政所宜不聽

劉麟傳麟拜工部尚書四司財物悉貯後堂大庫司官出納多侵漁麟請特除一郎官主之帝稱善因賜名節慎庫已上節財十四事汰內府諸監局冒破錢中貴大恨麟清修直節當官不撓居工部爲天子惜財謹費僅踰年而罷

鄭一鵬傳一鵬官戶科左給事中宮中用度日侈數倍天順時一鵬言今歲災用詘往往借支太倉而清寧仁壽未央諸宮每有贏積率饋遺戚里曷若留供光祿彰母后德帝命乾清坤寧二宮暫減